

授堂金石文字續跋

授堂金石文字續跋卷五

假師武億虛谷著

男穆淳編

孫未重校刊

唐駕鸞碑題名

在秦山

岱嶽觀諸題記內一文云節度判官中大夫檢校尙書口
部郎中兼侍御史敬審節度押牙中大夫試殿中監馮珣
山人呂滔文林郎守兗州府兵曹參軍田浩文林郎任城
縣高銜朝散大夫行任城縣令權知乾封縣令楊序節度
驅使官朝散郎試光祿寺主簿明幹唐建中元年二月廿
日同缺因訪瑤池故志之敬審見唐書宰相世系表審大
理司直與此題名相符又楊序亦見表觀王房而未著其
歷官蓋表文有脫

正書建中二年十一月

大辨正廣智三藏和尚碑
 碑中斷裂首題銀青光祿大夫御史大夫上柱國馮口縣
 開國公嚴郢撰銀青光祿大夫彭王傳上柱國會稽口開
 國公徐浩書新唐書郢本傳盧杞引郢為御史大夫其階
 與勳爵皆未及浩本傳德宗初召授彭王傳神道碑云皇
 拜彭而階銀青亦未之及會稽下缺字於時進封郡公當
 為郡字也碑載大辨恩遇之隆自元宗特見高印訖肅宗
 代宗三朝皆為灌頂國師初以特進大鴻臚褒美及示疾
 不起又就臥內加開府儀同三司肅國公減度後代宗為
 廢朝五日贈司空按不空見舊唐書王縉傳云胡僧不空
 官至卿監封國公與碑相符

吳嶽祠堂記

正書與元
元年十月

記文前列將仕郎守太子正字馮翊冷朝陽書碑末題字
書記朝散大夫殿中口御史內供奉于公異奉命爲記案
書碑在製文者之前朝陽爲制官尊于幕寮也公異傳見
舊唐書云吳人登進士第文章精拔爲時所稱建中末爲
李晟掌書記今此碑題銜正值其時惟充殿中侍御史內
供奉官是以幕吏兼憲職史不具錄矣記稱鳳翔隴右涇
原四鎮北庭兼管內副元帥兼中書令西平郡王李公晟
有事于吳嶽之祠下又云詔使中使孟希价持傘賜神錦
袍金帶夫人花冠後又徵諸故事當開元廿八年詔使正
議大夫內口侍寶元禮賜食致祭至天寶八年哥舒翰拔

石堡破番蠻封神爲成德公至德乾元之間累有褒口口
爲天嶽王禮儀志天寶十載正月遣大理少卿李禎祭吳
嶽山成德公後肅宗至德二年春在鳳翔改汧陽郡吳山
爲西嶽增秩以祈靈助據碑則由八載哥舒翰平蠻始進
封成德公而至德間增秩不書爵號今碑所云封爲天嶽
王足以補錄也寶元禮見逸人寶居士神道碑居士之季
子元禮官梨園教坊使行內侍省內侍又載元禮爲正議
大夫並與此記合天寶八年當稱載追紀者失實

教習觀世音菩薩石像銘

正書貞元七年二月
在洛陽龍門

石像銘戶部侍郎盧徵撰前三行損蝕蓋自序初以劉晏
得罪坐貶珍州司戶故云夜宿龍門香山寺口龕天眼口

口相對口首口嘿如暫降臨因發誠願歸施之日於此造
等身像一軀此乃夜郎之役也夜郎卽珍州與史志合序
又云貞元更黜又過於此僕夫在後獨行在側有白衣路
人隨口先後因唱言曰去日花開來時菓熟其去也春三
月貶信州長史其歸也秋八月遷右司郎中詳求所言昭
報復以闔門幼弱萬里沿岸畏途炎瘴鮮克保全勝衣含
氣我獨無口卽知慈雄覆護匪無顯効云舊唐書列傳
盧徵范陽人元琇薦徵爲京兆司錄度支員外琇得罪坐
貶爲信州長史遷州刺史入爲右司郎中驟遷給事中戶
部侍郎並與徵自序合新唐書徵附劉晏傳後所載琇得
罪貶秀州長史誤也徵後書長兄從時任河南府司祿參

軍及姪前鄧州南陽縣師目前汝州葉縣尉師牧師稷師
益諸人名

法玩禪師塔銘

正書貞元七年十月在登封少林寺

名敬法玩俗姓張氏其先魏人年十八學道于大照大師
廿受具戒報年七十六僧夏五十七以貞元六年秋八月
十三日寂滅于東都敬愛寺越十九日門弟子等奉全身
建塔于少林寺之西偏絃杖執紼赴喪會者以萬數按大
照卽普寂賜號他文誌釋氏之歿多云俗壽若干僧臘若
干此作報年作僧夏送葬之衆史于大照稱士庶傾城哭
送閭里爲之空及大智葬伊闕之北送葬者數萬人狂逐
風靡斯最盪矣銘前列太中大夫守京兆尹上護軍賜紫

金魚袋李充撰舊唐書德宗紀貞元八年壬午以左庶子
李允爲京兆尹是允卽充之訛文而紀前文有二月丁亥
則此壬午爲三月紀脫紀矣後文十一年夏四月壬戌貶
京兆尹李元信州長史元又允轉訛皆依碑作充爲正充
撰銘當貞元七年十月已列銜京兆尹紀書在八年爲京
兆尹舉其實官言之也最末乃列扶風馬士瞻書無官階
不敢與撰者並銘又云紀無相之士宜略其族譜述無爲
之教宜捨其示現蓋文後見例凡爲僧誌者所當取式于
此

裴潏嶽廟題名

右題名正書在盧朝徹謁嶽文之後文云貞元九年七月

廿五日參軍事裴潏題後列進士裴諫裴誼懷州河內縣
丞盧渚前華陰縣丞盧佩前萬年縣裴堪等名舊唐書列
傳裴潏河東人少篤學善隸書以門蔭入仕元和初累遷
右拾遺轉左補闕新唐書同據題名貞元九年方爲參軍事此
卽以門蔭入仕時也沈亞之河中府參軍廳記國朝設官

無高卑皆以職授任不職而居任者獨參軍焉觀其意蓋

欲以清人賢胄之子弟將命試任使以雅地任之耳

文苑英華

關中金石記攷潏以蔭起家此稱參軍事而不著地當卽
是華州諸司但未辨何司予以職官志上州司功司倉司
戶司兵司法司士六曹參軍事各一人外又有參軍事四
人華州爲上輔於設官當四人然則參軍事卽四人

中之一非六曹諸司也題名字體端勁必濳之自書得此
益見善隸書非虛美矣

鄭全濟華嶽題名

右題名正書自左起文云將口口守尉鄭全濟字巨舟華
陰縣尉李端士華陰縣尉鄭暉貞元十三年三月廿四日
題記鄭暉見宰相世系表

河東鹽池靈慶公神祠頌碑

正書貞元十三年四月

碑記爲將仕郎太常博士崔放撰將仕郎前試大理評事
韋縱書新曆書宰相世系表崔氏清河小房有放與敦敦
汝敏列一格韋氏鼓城公房有縱左金吾衛兵曹參軍今
碑所署卽其人記載元宗御國五十年姦產蒞邱嗣聖受

命以兵靜之調發之費仰于有司雖田征益加而軍實不

足遂收鹽鐵之算置推酤之官西籠解梁左隸安邑終歲

所入二百千萬供塞垣盡敵之賞舊唐書食貨志云自天

寶末兵興以來河北鹽法羈縻而已暨元和中皇甫鎛奏

置稅鹽院同江淮兩池權利人苦犯禁據此碑言代宗時

因兵興已置推酤則鹽法非止爲羈縻已記後載貞元九

年天子親祀明堂

云

戶部尙書裴公延齡以河中爲會

府遂表職方郎中兼御史馮公興推其事又命前永樂縣

丞張巨源前鄭縣丞蕭曾率屬而臨之洎十一年秋九月

裴公薨今戶部侍郎蘇公弁繼之又以前詹事府司直陸

位知解縣池前大理評事韋縱知安邑池唐時兩池置官

略備于此矣延齡首籠利權以毒天下而其爲之佐者又
數人本傳惟言貞元八年遷戶部侍郎判度支凡設謀釣
距肆爲剝蝕皆已悉書而酷鹽在河中獨不及之又八年
爲戶部侍郎至九年已歷尙書史於其轉官更失紀皆疎
也新唐書本傳同碑稱貞元十一年秋九月裴公逝今戶部侍郎
蘇公弁繼之延齡傳作十二年蓋史誤弁本傳裴延齡卒
德宗聞其才特開延英面賜金紫授度支郎中副知度支
事遷戶部侍郎依前判度支與碑所記符記前云中宗復
政崇朝而復鹹大歷陰霖巨漲而不淡蔣鎮傳鹽池爲潦
水所入其味多苦韓滉慮鹽戶減稅詐奏雨不壞池池生
瑞鹽當時固以欺飾爲之而躡事者又勒之頌詞以長其

偽然則敖之文雖瞻腴固非實錄也

徐浩神道碑

貞元十五年十一月

碑後題銜稱表姪前河南府叅軍張平叔題諱新唐書食貨志戶部侍郎張平叔議榷鹽法弊請官糶鹽可以富國李渤傳載度支使張平叔斂天下逋租昌黎集論鹽法事宜狀議張平叔所奏蓋其歷官叅之此碑皆可畧見然終爲一計臣而已題諱之古前跋已言之近校潛研堂金石跋尾謂周益公跋初寮王左丞贈曾祖詩末題通直郎田棧填諱據爲宋人已有之不知唐固有之而錢君未見此碑全本也又麻衣子神字銘有云南陽貢士李珣填諱碑由學述魯辨誤二男字述魯遺書文時父已沒矣因於親

諱倩人填之君子之於名終其慎如此浩碑爲次子峴所書固猶是也

軒轅黃帝鑄鼎原碑陰

正書貞元十七年在闕鄉

鑄鼎原碑陰分三層第一層載碑銘釋文口州刺史太原王顏撰華州刺史陳郡袁滋書舊唐書良吏傳袁滋字德深陳郡汝南人與碑題稱郡望合其出爲華州刺史傳書在貞元十九年後今此碑當十七年已爲華州刺史矣案德宗紀貞元十六年三月壬子以尙書右丞袁滋爲華州刺史潼關防禦鎮國軍使紀與傳不合以此碑証之當依紀十六年爲是此碑十七年題銜華州刺史爲得其實傳作十九年誤也

第二層爲王顏進玉石冊表草其略云臣所部湖城縣界有鑄鼎原欲於原最高處刻石表之選地對穿得玉石一片爲土工所折今作四段有縣珮孔子二微臣恐是黃帝上昇微臣遺墜之物臣檢算歷帝紀黃帝去今六千四百三十年伏以天下有道地不藏珍微臣不勝驚喜慶忭之至謹差朝請郎行司兵參軍暢賞隨表奉進案舊唐書經籍志有年歷帝紀二十六卷姚恭撰此表稱歷帝紀疑卽其書五行志載寶歷二年五月神策軍修苑內古漢宮得白玉牀以獻此記王顏所進玉旣請付史館志竟不見錄當以其附會非實故也

第三層題名錄事參軍裴口司功參軍張口湖城縣令房

朝靜宏農縣令李日豐湖城縣丞王遇湖城縣尉王吳圻
湖城縣尉史謹鎮遏將守左武衛中郎將常憲專知官同
十將試殿中監杜晏同勾當官右廂副將守左金吾衛左
執戟閭晏河東裴宣簡書王雅刻字以舊唐書職官志攷
之縣有鎮遏將不見于史鎮遏多屬使職而此云將疑官
職後有增設也同十將之號史志亦無文右廂副將不載
其屬何衛案左右武衛威衛及領軍衛各分左右廂隊而
官設隊正副隊正則威衛領軍衛有之然則右廂副將其
卽副隊正與金吾衛內執戟未分指爲左右得此乃知執
戟五人以左右各分之共爲十人也

易州刺史田琬德政碑有十將兵馬使之

楚金禪師碑

正書貞元二十一年七月

碑載禪師廣平程氏法諱楚金歿以乾元二年七月七日
子時具書其諸多靈跡並及恩遇之隆勅驃騎大將軍朱
光暉監護舊唐書呂諲傳肅宗卽位於靈武諲馳行在內
官朱光輝李遵騫薦有才代宗紀收捕越王係及內官朱
光輝馬英俊等禁錮之碑所稱朱光暉者是其人但暉宜
從日依碑文爲正碑爲紫閣山草堂寺沙門飛錫撰正議
大夫行中書舍人翰林學士上柱國東海男賜紫金魚袋
吳通微書通微本傳自壽安縣令入爲金部員外郎召充
翰林學士尋改職方郎中知制誥改禮部郎中尋改中書
舍人据碑文題銜爲翰林學士時已行中書舍人不應改

禮部後始轉此官也又階勳與爵傳亦失載並宜以碑補之

勅追諡號記

追諡楚金禪師別爲記文附刻碑末文云貞元十三年四月十三日左街功德使開府郇國公寶文場奏千福寺先師楚金是臣和尚於天寶初爲國建多寶塔置法華經云云奉勅賜諡曰大圓禪師文場見舊唐書載文場與霍仙鳴並掌禁軍寶霍之權振於天下而文場自爲左神策軍護軍中尉又累加驃騎大將軍按之碑所記歷官爵勳皆未及也新書本傳同

渤海郡王高秀巖墓碑

馮令問撰元和二年十一月

碑載高秀巖開元中授華州萬福府別將又授壯武將軍

同州襄城府折衝都尉旋改左虎賁將軍時丁家難歸於

絳郡河東節度使王忠嗣請起復充河東節度都虞候廿

八年爲臨洮軍大使加輔國大將軍隴州刺史又充河西

隴右兩道副持節河源軍城使領所統將士隴右節度使

幽州節度慕其嘉聲表奏薊州刺史續除河東節度留後

乾元二年遷戶部尚書兼御史大夫河東節度使渤海郡

王上柱國實封七百戶以舊唐書按之肅宗本紀至德二

載十二月己丑賊將僞范陽節度使史思明以其兵衆八

萬之給與僞河東節度使高秀巖並表送降

杜工部集塞
廬子詩思明

割據衛秀巖西未已蓋
以哥舒翰舊將降賊者史思明傳令衙官賈子昂奉表以

所管兵衆八萬人及以僞河東節東使高秀巖來降肅宗
大悅封歸義王范陽長史御史大夫河北節度使朝義已
下並爲列卿秀巖雲中太守以其男如岳等七人爲大官
使新唐書同是其事也然史言秀巖但爲雲中太守攷秀巖爲
幽州節度表奏是當祿山時已除河東節度留後及納順
而酬以太守恐未足滿其望如碑言節鎮郡王乃相當爾
未審史何以遺之不書也秀巖有子八子孟曰頌次震次
霽次霞次霖次霄次霧次滯史作男如岳等七人而如岳
名與碑亦不符或上碑時又更易也

楊岐山廣禪師碑銘

正書在
洋鄉縣

碑爲中山劉禹錫撰及正書序略云禪師諱乘廣其生容

州姓張氏十三慕道至衡陽依天柱想公至洛陽依荷澤
會公後又識上首甄叔率其徒道進道宏如亮如海等具
役建塔于禪室之右廣公始生之辰歲在丁巳當元宗之
中元生三十而受具更臘五十二而終終之夕歲值戊寅
當德宗之後元三月既望之又十日後九年其門人遺順
始請建銘而中山記之是爲元和二年矣碑記年書中元
後元他碑亦希見鳳臺晉燕亭官萍鄉拓得之贈予前著
錄者未及也

壁畫功德記

篆書元和四年二月

碑首題奉爲先考贈工部尙書先妣贈魏國太夫人壁畫
功德記蓋袁滋自記自書如此滋記云滋以天寶中生于

邛州安口縣五歲離蜀川路出斜谷至貞元十年奉朝命
充持節冊南詔使及過金牛縣竝嘉陵江而行泊永貞元
年滋又充貳川安撫大使因登梓州慧義寺伏思往年雲
南回日過新建竊欲資于繪事少申恩于罔極遽罹多故
有志未遑其年冬貶吉州刺史明年九月西川旣平滋亦
蒙皇慈昭洗再授旌鉞至止之日周步殿宇遂命工人圖
畫藥師琉璃光如來功德一鋪舊唐書德宗紀貞元十年
六月癸丑以祠部郎中袁滋兼御史中丞爲冊南詔使與
記合滋本傳書奉使在十九年九字傳刻誤衍耳傳言劉
闢擁兵擅命滋持節安撫行及中路檢校吏部尙書平章
劍南西川節度使新唐書本傳詔滋爲劍南西川山南西道

安撫大使半道以檢校吏部尚書平章事爲劍南東西川節度使以記証之滋自初命有充貳川安撫大使之文是也及後爲節度舊書惟稱滋爲劍南西川者得其實新書作東西川爲誤地理志廣德元年黃門侍郎嚴武爲成都尹復併東西川爲一節度自崔寧鎮蜀後分爲西川自後不改滋又安得東西川而兼領之況記言西川旣平再授旌鉞至止之日周步殿宇滋生于邛州安仁縣邛州爲西川節度所治滋故以到官後得至其地此尤情事可想者也記言永貞元年冬貶吉州刺史明年再授旌鉞蓋復授西川節度非卽爲義成也新書本傳書貶吉州在于西川節度之後陵越失其次矣又旣貶刺史安得稱遽徙節度

明滋前有西川之命後方云徙義成耳史文過事節縮反
于事跡有晦也宰相世系表滋父咸寧令記稱先考贈工
部尚書表畧之不書以非實歷官也後又正書題銜銀青
光祿大夫檢校刑部尚書使持節滑州諸軍事兼滑州刺
史御史大夫充義成軍節度鄭滑等州觀察處置管內營
田等使上柱國淮陽郡開國公食邑二千戶新舊二書于
其階官勳爵未備載拓本裝裱成冊何夢華藏置闕近已
失其石刻故著之尤加詳焉滋工篆籀書雅有古法予所
見惟鑄鼎原及此而已

薛存口題名

右題名正書自左起文云司勳員外郎薛存口華陰縣令

柳澗華陰縣主簿裴秩華陰縣尉杜文舉前鄭縣丞韋殷
前華陰縣口王沂口客李口元和四年九月十九日按薛
存下缺字當作誠舊唐書薛存誠傳裴洎作相用爲起居
郎轉司勳員外與題名合柳澗附見韓愈傳云華州刺史
閻濟美以公事停華陰令柳澗縣務俾攝椽曹居數月濟
美罷郡出居公館澗遂諷百姓遮道索前年軍頓役直後
刺史趙昌按得澗罪以聞貶房州司馬愈因使過華知其
事以爲刺史相黨土疏理澗留中不下詔監察御史按驗
得澗贓狀再貶澗封溪尉又皇甫湜韓文公神道碑云華
州刺史奏華陰令柳澗贓詔貶澗官澗任華陰坐貶始末
如是然則澗之挾怨煽衆固黠吏所爲而刺史相黨必致

之罪亦世清哉

河南府司錄盧公夫人崔氏誌銘

正書元和
甲午十月

誌前列中侍御史內供奉竇從直撰後列公變書名而不氏未知其于崔盧何屬也從直見宰相世系表書官兼殿中侍御史與誌合崔氏曾大父通許州司馬王父知悉祕書丞贈國子祭酒父倫代宗朝以前御史中丞使吐蕃拜尙書左丞歿諡敬公案倫附新唐書子衍傳寶應二年以右庶子使吐蕃虜背約留二歲執倫至涇州逼爲書約城中降倫不從更囚邈婁城閱六歲終不屈乃許還遷尙書左丞以疾改太子賓客卒倫加官爲常袞草制見文苑英華云頃以昆夷之俗繼好勤誠不忘緩懷喻我文告

乃命

太中大夫前守太子右庶子兼御史中丞上護軍賜紫金魚

袋崔倫宣明威惠撫柔西海終能復命亦既序成云可

銀青光祿大夫行尚書左丞與誌所言拜尚書左丞合誌

言伯曰譚左司郎中仲曰榮右補闕叔曰殷衡州刺史元

昆衍德宗朝以御史大夫觀察宣歙池三州歿諡懿公衍

本傳云遷歙池觀察使與誌合而以御史大夫出任于外

史失載行見舊唐書孝友傳略其論不著未若新書之詳又誌稱叔曰殷卽傳稱

倫弟殷趨白衍所稟舉送夫人所者也誌夫人書其伯叔

及兄金石例冗濫牽附無過斯者非可爲式也

內侍李輔光墓誌銘正書元和十年四月

誌首列朝議郎行尚書刑部員外郎崔元略諡宣德郎前

晉州司法參軍巨雅書文云輔光建中歲以良胄入侍充
白身內養超授奚官局令勲以元從之號又遷掖庭局令
興元初遷內侍伯又承命爲印納使邕管地偏人狡輔光
奏請于海口置五鎮守促又太原口帥李自良薨于鎮監
軍使王定遠爲亂兵所害輔光馳命安撫便充監軍使後
特恩遙授內給事元和初復遷內侍省供奉官又拜內侍
省內侍知省事又充鴻臚禮賓使又轉內弓箭庫使又除
河中監軍兼絳州銅冶使又有聖恩表異圖形省閣之文
舊唐書宦者傳元和長慶以來高品白身之數四千六百
一十八人誌稱輔光充白身內養白身自爲宦豎清資逮
元和後號始猥濫而內養之名不見于志惟楊收傳有內

養郭全穆此其可証一也食貨志大歷四年第五琦上言請于絳州汾陽銅原兩監增置五爐鑄錢許之職官志諸鑄錢監絳州三十爐誌稱輔光兼絳州銅冶使當以鑄錢重其事特設此官蓋權宜爲之不見于史爾史于職官內皆書勲號功臣有圖形戢武閣凌煙閣而內史省諸官獨缺錄今誌稱勲以元從圖形省閣宦者殊寵于斯極矣又王定遠見李說傳王定遠欲謀殺說後知事敗走登乾陽樓召其部下將卒多不之應比夜定遠墜城下槎枿傷而不死有詔削奪長流崖州據誌則爲見害于亂兵誌宜得其賞輔光有妻輔氏子四人希晏希暹官內侍省希昇無官惟仲昇官開府儀同三司檢校太子詹事兼殿中侍御

充河東節度保寧軍使行次既不從希官又不爲內侍蓋必希輔光之勢冒爲闖兒以規進取者崔元略傳元和十二年遷刑部郎中据此誌在十年署銜員外郎殆以是叙遷也元略以士人爲闖宦諛墓訟言與兄從事中都俱飽內侍之德將命錄寶且無媿詞攷元略嘗以諸父事內常侍崔渾峻則其詔附出于結習固不知其言之醜也

南海神廣利王廟碑

正書元和十五年十月

碑前列使持節袁州諸軍事守袁州刺史韓愈撰使持節循州諸軍事守循州刺史陳諫書并篆額舊唐書孔戣傳戣授廣州刺史先是準詔禱南海神多令從事代祠戣每受詔自犯風波而往韓愈在潮州作詩以美之今此碑後

繫以詩者當謂此也然傳謂在潮州不知其已移守袁州
矣唐書禮樂志五岳四鎮歲一祭各以五郊迎氣日祭之
至四瀆則略而不著祭日今碑稱以立夏氣至命廣州刺
史行事祠下知與嶽鎮同也又禮冊有皇帝名乃上所自
署其文曰嗣天子某謹遣官某致祭志文亦不詳其事此
文集本與石本異者惟海嶽之祝碑以祝作祀祀之之歲
碑以祀作祝又碑題集本作南治神廟碑石本闕入廣利
王三字

王璠華嶽題名

右題名正書自左起文云起居舍人賜緋魚袋王璠元和
拾伍年拾壹月貳拾陸日使鎮州宣慰使王璠本傳元

和中入朝爲監察御史再遷起居舍人副鄭軍宣慰于鎮
州新唐書瑊以起居舍人副鄭軍宣慰鎮州此題稱元和十五年與傳合而瑊
出使重鎮宜賜章服以寵其行傳失紀此事蓋從略也

裴穎華嶽廟題名

右題名正書自左起文云長慶元口口口十三日朝散大
夫行華陰縣令上柱國裴穎奉勾當再修中門屋至廿五
日功畢案宰相世系表東眷房裴穎衛尉卿駙馬都尉諸
公主列傳齊國公主下嫁張洎又嫁裴穎年代差遠當別
爲一人南來吳房亦有穎官左通道率府兵曹參軍或卽
是題名者與

邠國公功德銘

正書長慶二
年十二月

碑稱梁守謙于大興唐寺花嚴院翻寫經律戒論及立經堂爲國祈福因述其撫蔡之功比晉公有過焉蓋聞人楊承和爲之文故多溢詞也承和題銜右神策軍護軍中尉副使兼右街功德副使雲麾將軍右監門衛將軍員外置同正員上柱國宏農郡開國侯食邑一千五百戶錢少詹事引唐書宦官傳劉克明弒敬宗樞密使王守澄楊承和中尉梁守謙魏從簡與宰相裴度共迎江王發左右神策及六軍飛龍兵討之承和事見于史者惟此案舊唐書李宗閔傳宗閔因駙馬都尉沈蟻結託女學士宋若憲及知樞密楊承和二人數稱之于上前後鄭注發沈蟻宋若憲事內官楊承和韋元素沈蟻及

若憲如黨坐貶者十餘人唐書

王守澄傳帝疾元和逆罪久不討故以宋申錫爲宰相謀
因事除之不克更因其黨鄭注李訓乘其辨於是流楊承
和於驩州韋元素象州遣中人劉忠諒追殺元素于武昌
承和次公安賜死是承和結黨坐貶見于史又其一也守
謙碑載歷官元和初授銀璋佐密命五年加金紫掌樞機
十二年後又題右街功德使驃騎大將軍行右武衛上將
軍知內省事上柱國邠國公食邑三千戶充右神策軍護
軍中尉明都太僕以守謙在唐史宦者無傳惟憲宗元和
十五年書帝崩于太極殿中尉梁守謙王守澄等共立太
子殺吐突承璀及澧王惲又引韓文公平淮西碑載守謙
撫然一事案舊唐書穆宗紀左右軍中尉馬進潭梁守謙

魏宏篤等請立門戟從之文宗紀寶歷二年敬宗遇害賊
蘇佐明等矯制立絳王勾當軍國事樞密使王守澄中尉
梁守謙率禁軍討賊誅絳王迎上于江邸又均傳憲宗曰
此惟李絳梁守謙知之時絳承旨翰林守謙掌密命更與
碑所載元和初佐密命合都氏皆失引

長安志丹鳳門街
東來庭坊上街上

將軍致仕
梁守謙宅

執笱豆西嶽題名

右題名正書自左起文云執笱豆爲國討叛思契丹懇祭
敬拜牢餼畢陳所期感通照鑒不昧列旌旗於綠野羅口
口於明廷共展禮容因以題記太和二年八月十八日男
守左驍衛倉曹叅軍上柱國賜緋魚袋方恭侍從朝覲按

此題執下字殘其半以名氏度之似蕃將臣於唐者然無所徵實以攷其迹惟叛思契丹在新唐書列傳言太和開成間朝獻凡四然天子惡其外附回鶻不復官爵渠長唐書傳亦云元和長慶寶歷太和開成時遣使來朝貢則當太和二年必有叛附故遠將聲討加以醜名曰叛思亦猶武后更號孫萬榮爲萬斬李盡忠曰盡滅默啜爲斬啜也是討叛思契丹一事可以補新舊書之闕蓋非細也

韋公式華嶽題名

右題名正書自左起文云京兆府功曹前秘書郎韋公式外甥鄭縣尉攝華陰縣主簿裴虔下低一格另書公式頻年佐理斯邑自後向逾紀六變官曹今者慮以官成身有

所繫奔馬到此追尋舊遊見前題處豈勝口口太和四年
上元日題案以後向逾紀推之此題在太和四年前題當
元和十二三年間矣官成以周禮鄭氏註謂官府之成事
品式公式率爾留記蹇蹇不忘于此信非俗吏也

李虞仲華嶽題名

右題名自左向右正書文云正議大夫使持節缺諸軍事

守華州御史中丞充潼關缺國軍等使上柱國缺開國男

食邑三缺金魚袋李虞仲太和四年七月十缺詔以立秋

修祀缺南都團練判官缺事柳乘同來舊唐書列傳李虞

仲太和四年出爲華州刺史兼御史大夫依題名乃爲中

丞而非大夫至於勲上柱國爵開國男皆未之及立秋修

祀華嶽以刺史攝祭亦禮儀志文所不具南都按之新唐書地理志上元元年號南都爲府二年罷都是年又號南都尋罷都則江陵久不名都矣題名猶稱此者襲舊名也呂諲傳上言請於江陵置南都勅改荊州爲江陵府永平軍國練三千人以遏吳蜀之衝南都置國練判官蓋由於此也

括舊唐書傳文

三藏大遍覺法師塔銘

行書開成四年五月

銘首題朝議郎檢校尚書屯田郎中使持節洺州諸軍事守洺州刺史兼侍御史上柱國賜緋魚袋劉軻撰後題安國寺內供奉講論沙門建初書軻初以僧而後返正附王璠傳與璠子遐休善者也其序元奘事特詳予參之舊唐

書列傳元奘洛州偃師人塔銘作河南緱氏人傳稱大業末出家銘載年十三出家屬隨季失御乃從高祖于晉陽傳稱顯慶二年卒年五十二銘作麟德元年二月五日卒年六十九案銘所紀元奘之卒其生實當開皇八年丙辰年十三出家當大業四年戊辰從高祖于晉陽是爲十三年丁丑于時元奘年廿二傳以從高祖爲出家之歲又以卒年爲五十二其生固當大業元年矣二說參差如是宜依石刻爲正元奘既生于開皇八年攷隨書地理志偃師舊廢開皇十六年置是元奘之生時未有偃師故云緱氏人也傳又稱貞觀初隨商人往遊西域攷銘載師自決西行經李大亮不容出關師乃背遁迨其歸自西域乃因高

昌商胡入朝附奏而傳附會以其初隨商人不亦謬歟莊
岳委談以聖教序雖有三藏演文等語匪元奘號其以稱
奘蓋以唐僧不空號無畏三藏謔今案塔銘既題三藏大
遍覺法師敘又稱慈恩三藏之事蓋元奘取號三藏久矣
非因不空致謔也

李景讓等西嶽題名

右題名正書文云

缺

史兼御史中丞李景讓御史裏行盧

□李前右□軍錄事參軍李映進士李灌李景祐盧崇鄭
繁鄭毅開成四年六月十九日新唐書列傳景讓寶曆初
遷右拾遺以題名所題兼御史中丞此當由寶歷至開成
十餘年官序如此而史失載也景讓性獎士類拔孤仄今

附名如進士李瀛凡五人從之遊覽亦其宏雅所致足爲世勸也

授堂金石文字續跋卷五終

受業聊城馮瀚校

授堂金石文字續跋卷六

偃師武億盧谷著

男穆淳編

孫未重校刊

唐陳商嶽廟題名

右題名正書自左起少有殘剝文云

缺

門郎中史館修撰

陳商會昌元年七月二十五日祇召赴闕與盧溪處士鄧

君蟠同題

缺

商題後六年自禮部侍郎出鎮陝又與鄧支

使同來十月

缺

舊唐書宣宗紀會昌六年迎神主下百寮

議皆言准故事無兩都俱置之禮惟禮部侍郎陳商議云

周之文武有鎬洛二廟今兩都異廟可也然不宜置主於

廟主宜依禮瘞於廟之北墉下今此題稱禮部侍郎出鎮

陝者卽其人昌黎集答陳商書時猶未第後元和九年進

士第此於題名時致通顯矣鄧支使不書名當爲鄧君蟠也百官志監察御史十五人凡十道巡按以刺官二人爲佐務繁則有支使

崔郇嶽廟題名

右題名自左起正書文云正議大夫守京兆尹賜紫金魚袋崔郇華州華陰縣令崔宏會昌二年六月十六日郇自汝海將赴闕廷時與宏同謁廟而過按郇見宰相世系表亦見權載之集崔陞神道碑曰郇今爲廷尉實當會昌元年是此題云守京兆尹蓋由廷尉擢是職也汝海卽汝州游宦紀聞稱坡公元豐七年自黃量移汝海蓋唐時已有此名矣

崔慎由華嶽題名

右題名正書自左起文云殿中侍御史集賢殿直學士崔慎由右補闕李當鄉貢進士崔安潛會昌五年二月八日同赴案慎由見新舊書傳當會昌五年並失錄其爲殿中侍御史集賢殿直學士安潛舊書本傳稱大中三年登進士第此在會昌五年固宜以鄉貢自題也

李貽孫題名

右題名大書自左起文云左諫議大夫充宏文館學士判館事賜紫金魚袋李貽孫大中三年十二月八日奉制祈雪小男進士同古學究靜復從行貽孫史不爲立傳予攷歐陽行周文集序爲貽孫所撰序云太和中爲福建團練

副使大中六年又爲觀察使其前結銜特詳所記實爲福建等州都團練觀察處置等使正議大夫使持節都督福州諸軍事福州刺史兼御史中丞上柱國賜紫金魚袋以此題証之當大中三年嘗官于朝至六年任於外矣全唐詩話元寶終于四門助教李貽孫序其文元寶李觀也與行周同年進士早沒而貽孫于其遺集爲之表章如此廣川書跋鄧都宮陰真人祠刻詩三章唐貞元中刺史李貽孫書蓋大中之前又爲刺史於忠州矣貞元中至大中越致通顯至此已八十餘疑貞元字尚有誤爲附識于此貽孫好文喜奇於斯可想其爲人而題名當亦貽孫所自書故可寶也

子德晦華嶽題名

題名正書自左起文云監察御史于德晦

缺

州鎮國軍判

官試大理評

缺

大中六年二月二十日同謁新唐書宰相

世系表德晦官同州刺史其見於史者惟此而已長安志

務本坊有左散騎常侍于德晦宅

杜順和尚行記

行書大中六年
年在西安府

碑列鄉貢進士杜殷撰朝義郎試右武衛長史上柱國董
景仁書其記杜順云京兆人堯之苗裔生于國之南門外
村後又序師代兄從軍及爲兄補甲受笞負薪爨火諸苦
行蓋忘身以濟于衆者又稱擲于急流中而復見見字旁
注胡匄反惟孔紆墓誌銘出將字旁注去聲他金石刻所

希聞

盧部幼女墓誌

正書在榮澤大
中七年七月

誌前敘云范陽盧部幼女姚婆年八歲後乃嘆其敏而不
壽以大中六年十月三日夭于襄州官舍以明年七月十
三日塋于鄭州滎澤縣廣武原叔祖贈給事中府君之
口後又題前檢校禮部員外郎盧部記案此誌部蓋官于
襄州遭其女夭歿爲返魄故原與昌黎女孥瘞銘相符合
人遊宦輕棄骨肉卒云效羸博之義而薄俗相仍遺棄殤
兒爲狗彘吞噬亦已忍哉姚婆予鄉呼繼妻之不曉理者
多有是稱部固取以名女由于鍾愛之深故以賤字也

定慧禪師傳法碑

碑前列金紫光祿大夫守中書侍郎兼戶部尚書同中書

門下平章事充集賢殿大學士裴休撰並書金紫光祿大夫守工部尚書上柱國河東郡開國公食邑二千戶柳公權篆額舊唐書裴休本傳異轉中書侍郎兼禮部尚書而不載充集賢殿大學士按之此碑兼禮部當爲兼戶部至於傳載十年罷相是年冬進階金紫光祿大夫攷碑之建立當大中九年已書此階然則史文繫於十年冬者誤也休嗜浮屠講求其說演法附著數萬言習歌唄以爲樂新書本傳文今碑稱定慧所著經旨書偈議論皆謂本一心而貫諸法顯真體而融事理其推演禪趣亦云至矣定慧號宗密姓何氏果州南充縣人其傳法自秀爲北宗以逮荷澤傳磁州如如傳荆南張傳宗密是其派也号不從虎避

諱故也史稱休書楷道媚有體法觀此碑信然

窳堵坡塔銘

正書咸通三年八月

塔銘爲高壩述並書其序毛國訥國崇昆季遵阿翁遺意建茲勝因其地北視橫山南隣畢陌所紀實者如此餘冗贅不足備錄然窳堵坡卽唐言塔耳而題重沓書之蓋以彼教法所名慮世不易曉故兼唐言以示其意與

左拾遺孔紆墓誌

正書咸通十五年三月在榮澤

誌爲鎮海軍節度掌書記將仕郎殿中侍御史內供奉賜緋魚袋鄭仁表撰并書仁表附舊唐書鄭肅傳云仁表擢第後從杜審權趙隣爲華州河中掌書記入爲起居郎以此誌推之尙帶殿中侍御史內供奉及誌後敘孔紆囑友

人鄭休範爲詩休範卽仁表字也史並缺書誌載紆歷官自及第後徵爲渭南尉直宏文館旋以萬年尉復帖文職又奏署觀察判官假監察御史俄轉節度判官又拜左拾遺內供奉會祖岑父皇任祕書省著作佐郎贈司空祖歿皇任禮部尙書致仕贈司徒父溫裕皇任檢校右僕射兼太常卿充翰林侍講學士册贈司空按孔緯傳載岑父歿溫裕不及贈司空司徒若以緯進加司空進位司徒當由此追贈祖父如其官也溫裕誌前載節制天平軍徵拜司徒貳卿傳亦失記仁表自敘與孔君同歲爲東府卿薦策第不中等罷去明年宴于口堂宴之日博陵崔公堯出紫薇直觀風甘棠下堯本傳拜中書舍人後出爲陝州觀察

使卽記云觀風甘棠下也又敘新進士得意歸去多不伏
拘束假限往往閱試不悉集貢曹久未畢公事故地遠迨
一千里例不給口假唐摭言載唐一代進士之制未錄及
此也又載故事赤尉從相府得朱紱殿中此縣尉得侍御
史之由史志並缺錄誌內出將句旁注去聲始知有病旁
注句字甚矣旁注句字皆金石例所無

尊勝陀羅尼幢記

僧崇厚正書中和四年十
一月在亳州叢林護國寺

尊勝陀羅尼經幢記首題云宣武軍亳州南護國禪院立
唐宣武軍節度使治汴州管汴宋亳穎四州故此記以軍
額統州名也其文序自乾符二年草賊王仙芝尙君長黃
巢等結聚羣克煞戮萬姓莫知其數突入京國後却返淮

陽北下寨約百萬餘衆討伐州縣燒劫鄉閭攻圍當郡賴
我當使司空當州尙書口口口共召集勇將剋口口殺口
其衆大敗是散諸處例皆斬首獻上天廷口萬姓再獲口
口骨肉團圓重啟生涯悉皆樂業軍人百姓等遂各捨資
帛造佛頂尊勝陀羅尼幢一所上答聖恩用資榮福時中
和四年歲次甲辰十一月六日建案仙芝與君長倡亂漢
陽黃巢從而附起旣陷京師敗退返淮陽北下寨與秦宗
權復寇陳州已當中和三年卽記所謂也舊唐書僖宗紀
三年六月黃巢與宗權合從縱兵四掠遠近皆罹其酷意
當時蓋遺羣孽復擾亳州故記有攻圍當郡之文而巢本
傳惟言與仙芝爲形援及仙芝敗東攻亳州不下其事當

乾符五年非此記所指記云賴我當使司空當州尚書紀稱以檢校尚書右僕射華州刺史潼關防禦等使朱溫檢校司空兼汴州刺史充宣武軍節度觀察等使然則當使卽宣武軍節度于時溫已檢校司空矣當州卽州刺史尚書云者亦以其檢校官稱之唐書紀光啓三年六月亳州將謝殷逐其刺史朱亥以時按之距中和四年未遠疑當州者爲亥也記又云其衆大敗星散諸處例皆斬首獻上天廷皆由當使當州募勇將促之於死攷紀載中和四年四月沙陀兵攻太康西華賊砦尙讓黃鄴遁去黃巢亦退保鄆城及巢渡河又得徐州將李師悅陳景思追之及朱瑄敗之而後授首全忠不與謀後檢五代史梁本紀全忠

及克用追敗之于郾城

云

則此記歸功當使非無謂也

記後列施主諸人名在記文之下有團練副使銀青光祿
大夫檢校右散騎常侍右監門衛將軍兼御史大夫上柱
國李茂彰節度押衙充馬步都虞候銀青光祿大夫檢校
國子祭酒兼御史大夫上柱國謝殷節度散兵馬使團練
押衙充順天高貴兩都都兵馬使銀青光祿大夫檢校國
子祭酒兼御史大夫上柱國郭王似瑑字節度散兵馬使
口遊奕都知兵馬使銀青光祿大夫檢校太子賓客兼御
史大夫上柱國孟從益節度衙前散兵馬使充押衙管將
銀青光祿大夫檢校國子祭酒兼御史大夫上柱國陳全
約節口口兵馬使團練押衙管將充都教練使銀青光祿

大夫檢校太子賓客兼御史大夫上柱國張崇節度兵馬使充團練押衙管將銀青光祿大夫檢校賓客兼御史大夫上柱國季仁邵節度散兵馬使團練押衙充防遏都銀青光祿大夫檢校太子賓客兼御史中丞孫從遠節度散兵馬使充團練押衙口將銀青光祿大夫檢校太子賓客兼侍御史上柱國名同節度副使充押衙管口營將銀青

光祿大夫檢校太子賓客兼殿中侍御史上柱國名後間

行書押衙管將兼殿中侍御史陳實兵馬使魏同餘多不具錄案却掃編云至德後自方鎮及賓佐幕職下逮卒伍之長莫不領中丞大夫御史之名名器之濫莫甚於此卽此題名所記矣謝殷見新書僖宗紀孟從益見舊書僖宗

紀光啟三年五月詔以汴將孟從益權知鄭州事從益爲
汴將而列名于此于是推諉有銜位者皆宣武所屬四州
之將也又官制不見于史志者節度散兵馬使節度衙前
散兵馬使團練押衙團練押衙管將充都教練使之屬皆
以唐季傾攘因事權置其名不可悉錄耳充順天高貴兩
都兵志載僖宗幸蜀田令孜募神策新軍爲五十四都此
必其二名矣然此記列銜十人階皆銀青而勳爲上柱國
者有九吕和叔代鄭相國謝賜戟狀所云吏考三十始秩
銀青戰勳十二乃號柱國蓋其始立制爲重慎而漸積至
于猥碎國是豈不日紊也與

重藏舍利塔記

正書沙門南敘撰僧知常書景
福元年十二月在京師法源寺

碑序隋仁壽二年正月勅天下大州一百處置舍利塔時
幽州節制賈抗創造五層大木塔飾以金碧扇舍利于其
下舊唐書列傳抗母卒歲餘起爲岐州刺史轉幽州總管
政並以寬惠聞記稱幽州節制者卽傳所云總管也後又
稱太和八年天火焚塔至宣宗丙寅歲勅修廢藍得石函
于故基下時清河公曉示人天傳觀供施遷藏于憫忠寺
多寶塔下後中和二年又值火災隴西令公大王巨崇像
設造觀音閣遂遷舍利于閣內觀音像前其略如是記內
于前後節使皆空格跳行書之不敢斥其名氏而于丙寅
及故基字不爲國諱僧徒庸頑昧于大義可慨也

蜀王師蓋文達碑

正書貞觀
二十二年

碑首題上柱國燕國公于志寧字處謐作此文惜文多漫
漉舉其所載歷官始末有云正議大夫蜀王師蓋公諱文
達字藝成吳州信都人曾祖慶魏彭成王記室參軍樂陵
郡守祖延齊安平王計曹從事父永隨幽州薊縣令又云
公以經明行修孤標獨秀大業三年授同安博士九年特
敕除守國子助教武德元年授國子助教又云今上縉光
藩服云後又以公學冠當時除國子博士十年詔授員
外散缺諫議大夫國子博士如故十一年從駕洛陽宮補
宏文館學士十二年詔授國子司業十三年詔授兼蜀王
師十六年丁母憂十八年詔授正議大夫兼崇賢館學士
春秋六十有七薨雍州開化坊里第卽以其年十二月歸

墓於舊塋舊唐書本傳文達字及三代名銜在隨時文達

所居官並略不書

唐書同

又十一年補宏文館學士傳載于

十年十二年詔授國子司業傳載于十三年叙次失其實

當依碑爲正前云仁風表於弦哥哥古歌字後稱世子國

子主簿宏式口世字不缺畫

贈邛州刺史狄公神道碑

正書在洛陽平樂北

碑舊見於金石補遺僅著其目予頃乃拓一紙攷其事跡

尙可撮舉相屬碑首言周封孝伯因受氏于狄城與宰相

世系表稱孝伯封于狄城因以爲氏合碑言樂平公出將

入相豹變于秦庭與表稱後秦樂平侯合碑言曾祖叔湛

魏平西將軍臨邑子與表稱湛東魏帳內正都督臨邑子合

但碑載叔湛較表多一井字碑言父孝緒唐行軍總管太將軍金紫光祿大夫尚書左丞使持節汴州諸軍事

缺與

表稱尚書左丞臨穎男合碑言公卽臨穎公之第五子也

又歷官可見者鄭州司兵參軍兼鄭王府兵曹參軍

缺授

口口梁州都督府錄事參軍

缺

俄改越州剡

缺

授鄭州鄭

縣令

缺

除夔州都督府長史

缺

贈使持節邛州諸軍事邛

州刺史下言嫡子故口書令尚書右僕射贈司空梁國文

惠公据是則碑爲梁公之父知遜也然表載孝緒三子知

遜卽居三而碑以爲第五子表載知遜越州刺史而碑以

爲贈邛州刺史前雖爲越州剡縣寗非任爲刺史疑表文

誤往時洛陽令王君宇嘗爲溧陽狄氏訪其先墓得梁公

碑于草間遂豎置白馬寺東偏因封樹焉不知狄氏先墓
固在平樂北山上俗名雙碑凹者以此也他日獲遇狄氏
當詳告之

張孝孫華嶽題名

右題名正書自左起文云銀青光祿大夫殿中監

缺將軍

左金吾衛大將軍

缺

節度副使元從鎮國大

缺

潼關節度

都虞候張孝孫恭謁靈祠案元從之號唐世凡三見新唐

書兵志初高祖以義兵起太原已定天下悉罷遣歸其願

留宿衛者三百人高祖以渭北白渠旁民棄腴田分給之

號元從禁軍

李晟傳時元從禁軍

肅宗紀有蜀郡靈武元從功臣德

宗紀興元元年四月壬寅詔奉天隨從將士並賜號元從

功臣兵志自德宗幸梁還以神策兵有勞皆號興元元從
奉天定難功臣今題名所記已失其年月或爲肅宗所賜
及德宗所號皆未可知也

蔣羅漢題名

右題名正書無年代文云內供奉開國公上柱國賜紫金
魚袋蔣羅漢舊唐書周智光傳判官監察御史邵賁都虞
侯蔣羅漢並伏誅疑此題卽其人然則羅漢殆叛黨也羅漢
之誅在大歷二年正月密詔討智光時是此題又當大歷
前矣

寶華題名

右題名正書在青州無年月益都段赤亭拓以見遺其文

白左起

缺

州觀察處置押新羅渤海兩蕃等使金紫

缺兼

青州刺史御史大夫上柱國韓國

缺

部員外郎兼侍御史

內供奉賜緋魚袋竇鞏

缺

裏行韋會

缺

上柱國齊孝宏

缺

儀郎薛華士

缺

方回鞏見舊唐書列傳平盧薛平辟爲副

使入朝拜侍御史

憲宗紀元和十四年三月己丑以義成軍節度使薛平爲青州刺史充平盧軍

節度淄青齊登萊等州觀察等使

韓昌黎竇牟蒸誌載鞏亦進士以御史

佐淄青府注孫曰元和十四年三月以薛平爲平盧淄青

節度使表鞏自副與舊唐書傳合然則鞏以佐幕至青在

元和十四年矣攷押新羅渤海兩蕃等使名代宗紀大歷

十年二月以平盧淄青節度觀察海運押新羅渤海兩蕃

等使德宗紀興元元年淄青節度使承前帶陸海運押新

羅渤海兩蕃等使宜令李納兼之據此題亦有押兩蕃之名當亦以淄青節度兼之則於時爲節度使者薛平也前列銜缺名意卽其人與

司空圖不全詩句

右詩存者惟有岳前大旆討淮西從此中原息戰聳二句按此爲司空圖視晉公赴敵淮西題名紀之一絕也晉公題名亡佚不可見今詩石又斷下二句矣說見王定保唐據言又全唐詩話亦載此詩云大順中戶部侍郎司空圖紀者然則題詩年代猶可攷也首句大旆作大隊討淮西作赴淮西皆與石本異文

南詔蠻頌德碑 正書

碑拓本由青浦王少司寇官雲南布政使日搨得之攜以贈余余按是碑殘滅過甚其句有可屬者云春命長男鳳伽異舊唐書傳鳳伽異閻羅鳳子也閻羅鳳北臣吐蕃吐蕃令閻羅鳳爲贊普鍾號曰東帝給以金印蠻謂弟爲鍾時天寶十一載今碑稱聖神天帝贊普當以吐蕃所號而更加之徽稱蠻會誕妄至此傳失載其事案新唐書南詔傳載會龍死僞諡景莊皇帝子法嗣法死僞諡聖明文武皇帝不知其先已稱神聖天帝矣後銘詞兼瓊秉節貪榮構亂開路口口政爰東竊賴我先王懷母伏叛先王謂皮邏閣也文獻通攷南詔居永昌姚州之間鐵橋之南東距爨東卽此東竊也本傳稱劍南節度使章仇兼瓊遣使至

雲南與歸義言語不相得歸義常銜之銘言貪榮構亂蓋指其事銘稱仲通口節不詢長口徵兵海口顧口江口謀口不臧帥師夜走仲通卽鮮于仲通也

唐書仲通率兵戎

嵩州閣羅鳳遣使謝罪仲通不許囚其使進軍逼太和城爲南詔所敗是也銘又稱李宓愬戎猶尋覆轍水戰陸攻援口踵致勢屈謀弱本傳天寶十二年劍南節度使楊國忠執國政仍奏徵天下兵俾留後侍御史李宓將兵十餘萬輦餉者在外涉海瘴死者相屬于路天下始騷然苦之宓復敗于太和城北死者十八九會安祿山反閣羅鳳乘釁攻陷嵩州及會同軍西復降尋傳蠻卽銘稱叩盧一掃軍郡雙滅觀兵尋傳舉國來賓者也其事與碑符合足爲

徵信不誣碑年月脫損据有閣羅鳳攻陷衢州在安祿山反時是碑之立亦當于天寶十五載後矣錢少詹事跋大禮國鐘題字謂滇中無古今石刻此猶唐時所鑄得之亦足以豪然鐘識題建極十二年不過當懿宗咸通十二年此碑猶在前也碑與磨厓題名皆一人書惜殘缺不得其名氏而書法之秀整唐刻工書者無以過也

南詔磨厓題名

正書無年月

磨厓題名殘剩不完其字文可見者缺袍金帶段忠國缺

清平官大軍將大金告身賞錦袍金帶兼缺官大缺清平

官缺虫皮衣楊傍佺清平官小頗彌告身賞錦袍金帶王

缺頗彌告身賞二色綾袍金帶缺守缺清平官大軍缺段

昌缺李缺大將軍開南城大將軍缺大大虫皮衣趙眉

邱缺大將軍士曹長大頗彌缺賞紫袍金帶缺皮衣楊

細缺大將軍賞二色綾袍金帶玉琮羅鐸大軍將缺頗彌

告身賞缺袍金帶兼大大臣皮衣張驃缺于大軍將前戶

曹長拓東缺大軍將缺告身賞二色綾袍缺綾袍金帶王

波鐸大軍將前法曹長大頗彌告身賞二色綾袍金帶楊

缺賞二色綾缺大軍將小金告身賞二色綾袍金帶楊羅

望大軍將小金告身賞錦袍金帶缺大軍將賞二色綾袍

金帶尹瑳遷大軍將小金告身賞紫袍金帶楊龍棟缺二

色缺棟附缺告身賞二色綾袍金帶尹附曾大軍將賞紫

袍金帶趙瑳羅望大軍將兵曹缺賞紫袍金帶趙逸羅缺

缺 二色綾袍金帶兼大大重皮衣孟綽望軍將士曹長小

銀告身賞紫袍金帶楊郁佺 缺 法曹長小頗彌告身賞二

色綾袍 缺 楊利盛大軍將小銀告身賞二色綾袍金帶楊

各舍大軍將賞二色綾袍 缺 細利 缺 客曹 缺 小銀告身賞

缺 賞二色綾袍金帶 缺 羅疋大軍將兵曹長小頗彌告身

賞紫袍金帶段君利大軍將 缺 小銀告身賞 缺 金帶 缺 大

軍將小銀告身賞二色綾袍金帶 缺 大軍將小銅告身 缺

綾袍金帶周 缺 二色綾袍金帶唐酋統大軍將賞紫袍金

帶喻酋苴大軍將賞二色綾袍 缺 缺 倉曹長小銀告身賞

二色綾袍金帶兼大大重皮衣張盛顛大軍將賞紫袍金

帶楊 缺 定 缺 大總管小銀告身賞二色綾袍金帶大大重

皮衣缺軍將前缺綾袍金帶洪羅棟大總管小銅告身賞

二色綾袍金帶缺軍將缺色綾袍金帶段旋忙湊軍將戶

曹長小銅告身賞紫袍金帶缺大總管缺忙湊軍將羣牧

大使小銀告身賞紫袍金帶楊瑳白奇缺兼知表詰小銀

告身缺楊缺銅缺和大總管兼押衙小鑰石告身賞二色

綾袍金帶石賢大軍將小銀告身缺段缺遲缺帶李奴郡

客曹長賞紫袍金帶王缺大軍將小頗彌告身賞缺帶缺

諾地缺頗彌告身賞紫袍金帶阿忍大軍將賞紫袍金帶

缺本大軍將小頗彌缺大軍將缺二色綾袍金帶黑紫羅

大軍將賞紫袍金帶缺大司編賞紫袍金帶孫白伽軍將

缺鑰石賞紫袍缺軍將賞紫袍金帶兼大虫皮衣劉望缺

喻軍將賞紫袍金帶

缺衣

缺軍將前兵曹判官小銅告身

賞紫袍金帶杜顛伽

缺

袍金帶兼

缺大軍將賞

缺

趙充

缺

軍將兵曹副小銀告身賞紫袍金帶

缺

軍將

缺賞

盛軍將士曹副賞紫袍金帶楊鄧四羅

缺

袍金帶

缺瑤龍

缺

軍將大銬石告身賞紫袍金帶段

缺

袍金帶

缺金帶

張羅

缺軍將

伽瑳軍將賞紫袍金帶楊潯波羅

缺身賞

缺

軍將廉人佐楊羅斂軍將賞紫袍

缺

袍金帶尹求寬

缺

金

缺楊

賞紫

缺

將賞紫袍金帶張

缺

軍將賞

缺金帶

缺

軍將賞紫袍金帶

缺

紫袍金帶

缺

小銅告身

缺斂詔親

大軍將大金告身賞二色綾袍金帶李外成苴

缺

軍將兼

白崖城大軍將大金告身賞二色綾袍李

缺

詔親大軍將

小銀告身賞二色綾袍金帶李些豐缺詔親大軍將賞

二色綾袍金帶放直缺詔親缺小金告身賞錦袍金帶獨

磨按南詔諸官結銜多與唐制符攷舊唐書南詔蠻傳載

其官制甚略惟云蠻謂相爲清平官凡置六人新唐書官

曰坦綽曰布燮曰久贊謂之清平官所以決國事輕重猶

唐宰相也此記題清平官凡四見最列在前蓋卽舊史所

云置六人也又稱大軍將者至二十餘人本傳所載有此

官其餘以大軍將兼開南城大軍將拓東大軍將白崖城

大軍將者凡三人又單稱軍將及忙湊軍將大總管羣牧

大使兼知表誥兼押衙大司編僉人佐新舊史文獻通考

四裔攷皆未之及傳言有六曹長此題稱土曹長戶曹長

法曹長兵曹長客曹長倉曹長與數相符而每曹之屬有副有判官見于此題者尙有兵曹判官一人兵曹副士曹副各一人則亦不能具錄矣傳載自曹長以降繫金佗其尙絳紫有功加錦文獻通考載舍龍生細奴邏唐高宗遣使者入朝賜錦袍開元末皮邏閣亦賜錦袍金鈿帶七事正與此同又有功加金波羅金波羅虎皮也此題稱賞錦袍金帶賞二色綾袍金帶賞二色綾袍金帶玉琮賞大大蟲皮衣賞紫被金帶兼大大蟲皮衣與史符合史稱邏盛至京師賜錦袍金帶歸國亦因其俗所尙而寵之惟虎皮稱大蟲與史言金波羅者微異題名以告身入銜亦南詔舊制其告身等差有大金告身小金告身大頗彌告身小

願彌告身小銀告身小銅告身小鑰石告身大鑰石告身亦宜取以資異聞也題刻稱地名拓東傳載六節度曰弄棟永昌銀生劍川拓東麗水此其一也廣德初鳳迦異築拓東城此時猶未有城故開南白厓皆名城而此唯名拓東蓋書其實如此又白厓城傳稱白厓驗夷語驗若州又載異牟尋破施蠻順蠻并虜其王置白厓城卽是地也此題名有尹附會傳載德宗遣袁滋册封異牟尋及滋還復遣清平官尹輔會等七人謝天子卽其人而石刻以輔作附尹求寬傳云遣清平官尹仇寬廿七人入獻地圖請復號南詔帝賜賚有加拜仇寬左散騎常侍封高溪郡王者是也而以求作仇譯音無定字題名時二人官位未顯至

此遂遷用爲清平官矣碑載洪羅棟傳以洪作湊或別爲一人忙湊傳作蒙湊史記秦本紀擊芒卯華陽索隱引譙周云孟卯也芒與孟通亦與蒙通音近則相轉也文獻通考或謂蒙湊自稱驃信夷語君也最後題詔親者三人蠻謂王爲詔當是王之親屬因以結銜別于疎遠若此

馬公神道碑

正書在洛陽平樂北山

碑四面書字篆額陰文凸起題云唐馬公神道碑正文已殘剝惟前稱京兆杜光泰撰顯存又碑言公諱承光高祖諱行威又言公少時學擊劍歷官內有衛尉少卿字蓋以武功致顯仕惜未審其實也前著錄者不之及

魏公先廟碑銘

正書

碑斷缺据金石錄載爲崔絢撰柳公權正書大中六年十一月余檢其句意相屬者証之舊唐書魏謩傳宣宗大中二年謩兼戶部侍郎判本司事今碑題有判戶部事字與史相符碑稱特進侍中贈太尉鄭國文貞公魏氏在貞觀立家廟案魏徵傳但云贈司空其特進侍中贈太尉皆不及碑載府君諱昇謩本傳云父馮獻陵臺令傳以昇爲馮宰相世系表亦同其舛碑載謩始以大理評事兼監察換殿中侍傳惟稱謩內徵爲給事中則於前以大理評事兼監察諸官六之過畧矣傳遷御史中丞尋以本官司平章事與碑言兼領邦憲又間歲進陟公台合至碑所云會昌中權倖惡忌擠之外郡卽傳謂謩坐楊李之黨出爲汾州

刺史也。篆文題曰博陵縣開國子食邑五百戶賜紫金魚袋崔名已殘。敕文內稱使門吏左補闕鄭愚口謂瑱以銘功述德。云者蓋卽崔瑒也。瑒傳稱大中七年權知戶部侍郎進封博陵子食邑三百戶。此題已有博陵縣開國子字。則碑當亦作於是時或更後。于是而金石錄旣以爲崔絢。又謂當大中六年當皆傳刻訛易也。

淮南節度使李珣神道碑

正書在偃師兩程書院

碑久佚無考。今始搜出。已厄于前明妄人鑿斷鐫治二碑。額推尋可辨者篆額。唐故淮南節度使贈司空口郡李公神道碑十六字。郡上缺字。以珣傳補之。是爲趙字也。文內有出爲下邳令拜殿中字及文宗山陵使字。新唐書珣本傳

以數諫不得留出爲下邳令武昌牛僧孺辟署掌書記遷
爲殿中侍御史遷門下侍郎爲文宗山陵使皆與碑合傳
蓋依之爲文故于舊書較詳王澤長續修縣志淮陽節度
使李珣墓在治西北有墓碑卽指此然不知碑已毀于前
明而附會書之也碑無年月可見舊唐書傳珣大中七年
卒碑之立蓋益後矣

重修法門寺塔廟記

正書天祐十九年
二月在岐山縣

記首題朝請大夫守尙書禮部郎上柱國賜紫金魚袋薛
昌序撰後題承旨王仁恭書其稱秦王謂李茂貞也舊唐
書昭宗紀景福二年十一月制以鳳翔節度使李茂貞守
中書令進封秦王是也茂貞本姓朱僖宗賜性李氏記所

稱天潢真異帝裔承榮蓋指其事法門寺見韓愈傳云鳳翔法門寺有護國真身塔此所重修塔意卽其遺跡與記稱天祐十九年歲次壬午前又以天復紀年至二十年參差無統唐之正朔亡矣歷代紀元彙攷于梁開平元年書岐王天祐四年証之此碑仍稱自天復元年及十二三十四十九廿年皆以天復紀號是當梁之篡唐未嘗以天祐紀推其誤蓋沿于通鑑謂唐之亡惟河東鳳翔淮南稱天祐也

授堂金石文字續跋卷六終

受業汝陽李應曾校